

11 DEC 1999

PELANTIKAN MUSA BUKA ALIRAN BARU, KATA ABIM

KUALA LUMPUR, 11 Dis (Bernama) -- Pelantikan bekas naib canselor Universiti Sains Malaysia (USM) Tan Sri Musa Mohamad sebagai Menteri Pendidikan menjadi pembuka kepada aliran baru bagi membolehkan kebolehan ahli akademik dan profesional yang bukan ahli politik dimanfaatkan untuk kepentingan negara.

Presiden Angkatan Belia Islam Malaysia (Abim) Ahmad Azam Abdul Rahman yang menyambut baik pelantikan Musa berharap aliran baru itu akan mencirikan pembentukan kabinet baru di masa akan datang.

"Pelantikan beberapa orang tokoh muda pula diharap dapat menyuntik ide-ide baru dan pendekatan yang segar dan dinamik untuk menggarap aspirasi pasca Dasar Ekonomi Baru yang lebih kritikal, terbuka dan global pada sikap dan pemikirannya," katanya dalam satu kenyataan hari ini.

Perdana Menteri Datuk Seri Dr Mahathir Mohamad mengumumkan senarai kabinet barunya semalam dengan menampilkan sembilan menteri baru termasuk Musa dan beberapa tokoh muda seperti pemangku Ketua Pemuda Umno Datuk Hishammuddin Tun Hussein, yang dilantik sebagai Menteri Belia dan Sukan.

Aktivitis sosial Datuk Lee Lam Thye menyifatkan kabinet baru itu sebagai gandingan baik muka lama dan pemimpin muda yang berbakat.

Pemuda Umno Perlis pula menyambut baik pelantikan Hishammuddin dan menyifatkannya sebagai bukti kepercayaan Dr Mahathir kepada golongan muda untuk menyumbang kepada pembangunan negara di alaf baru.

-- BERNAMA  
AFY RIS MAI